

# JUBILE BRAZ AN NAONTEG KANVED

Embannet gant hon Tad zantel ar pab Leon trizek

WAR DON : *Zantez Mari, mam Doue pe Kelven*

DISKAN

*Spered zantel, me ho ped, roet d'in sklerijen,  
Ma zikouret dre ho kras, evit rein da gompren  
An dalvoudegezh ken bras dimeus ar Jubile  
'Zo digor 'wit ar bed holl gant ar bloavez neve.*

Gras ar Jubile an euz kalz-kalz a dud zalvet,  
Hag a rey c'hoaz er bla-man, ha beteg fin ar bed  
Ar zent deuz ar baradoz a c'halvan da desto :  
Ped a zo bet distroet dre ar jubileo ?

Hag en zo war an douar eur gwelloc'h tu na tro  
Da derri konnar Doue eneb ar pec'hejo,  
Ha da ziellan ar peuc'h etrezomp ha Doue,  
Evit bean kemeret en renk e vugale ?

Er Jubile, Kristenien, Doue rey d'ac'h mado,  
Ha dreist pep tra an distol deuz hoc'h holl bec'hejo.  
Rak enon e kavfet zur gwir glac'har d'oc'h ine,  
Dre-ze ho pezo ar peuc'h ha graso puilh ive.

Nan euz den war an douar a c'hallfe lavarout  
Evrusted eur c'hristen hag a ra talveout  
Ar c'hras deuz ar Jubile, tensor kaer ha paduz,  
Pa eo gwir e tisruilh d'imb deuz a galon Jezuz.

Nan eo ket ma daoulagad 'vit harz da skuilh daere  
Pa zellan ar vadelez a Jezuz hon Otro,  
Petra benak meur a wech 'meuz outan dizentet  
Hag e lezenno zantel dre ar pec'het torret.

Indulgans ar Jubile zo bras en gwirione  
Ha d'an holl drouk sperejo ec'h eo spontuz ive,  
Deuz adaleg ar sav-heol bete kuz-heol dleer  
Esa gonid eur tenzor ken talvouduz, ken kaer.

An holl zent lavar 'n eur voez ez eo eur sklerijen,  
Spouron an holl diaolo, eul louzo 'vit pep den,  
Rei a ra c'hoaz karante d'an den mad, d'ar pec'her,  
Ha kreski a ra hon fe daleg m'hen goneer.

D'an nep a c'hone 'nean eo c'hoaz magadurez ;  
Rei a ra nerz d'ar c'hristen da urzan e vuez,  
An ine a zo dreiz-an pare a glenjejo,  
Gant ma ve goneet mad e ro d'ezi louzo.

Eun dra fall eo disfiout diouz madelez Doue,  
Gwir eo ez oc'h pec'herien, med troet a vue,  
Goulennet pardon, true, kasât ho pec'hejo,  
Ha gant ho Salver Jezuz trugare ho pezo,

Rentet meulodi, Breiziz, da vadelez Doue,  
Gant-an hep mar oc'h karet, ouzoc'h an euz true  
C'houi zo zur deuz e galon ar gwellan bugale,  
Rak mil ha mil zo maro hep kaout jubile.

Deut eta, c'houi Tregeriz, pa eo digor an nor  
Deut, Goeloiz, Kerneviz, da glask eur seurt tenzor,  
Mar 'zo vidoc'h poan, dispign, e zo kals da c'honid,  
Graso puilh digant Jezuz, ha c'hoaz kals a dellid.

Arru eo 'n Otro Doue evit mont daved-oc'h,  
Setu ar c'hras marteze diwean evid-oc'h,  
Er bla-man evit ho mad, goneet 'r jubile,  
Dilezet ho pec'hejo evit kât gras Doue.

Holl ho peuz pevar abek da dont d'ar jubile;  
Enor an Iliz hon Mam, ha bolante Doue,  
Gloar braz ar relijion, hak ho silvidigez  
Ha deuz an anaon paour ar frealzidigez.

Oh! pec'herien aheurtet, chilaouet mouez Doue,  
Na ret ket skouarn vouzar, keuz ho pije goude,  
Hirie e kavet graso, varc'hoaz na gefet ket  
Ha dre ho leziregez 'risket bean kollet.

Ar Werc'hez zakr mam Doue, holl zent ar baradoz,  
Ho zant paeron, hoc'h el mad a zo ouz ho kortoz,  
Chilaouet erfad, dreist-holl, ar voez karantezuz  
Deus ho Tad holl-c'halloudek, ar voez deus a Jezuz.

Drouk sperejo an ifern 'vezo holl konaret,  
Med ar zent hag an ele a vo laouenneet,  
O welet, er jubile, kalz bras a bec'herien  
'Tont da distrei ouz Doue dre eur wir binijen.

O ma Zalver binniget, Doue karantezuz,  
Anaout reomp breman ho kalon truezuz,  
A greiz kalon, ma Jezuz, leromp d'ac'h trugare,  
Mont refomp holl da c'honid graso ar Jubile.

Pedi refont 'vit ar Pab pen kentan an Iliz,  
'Vit hon bro garet ar Frans, 'vit hon broïk Breïz,  
'Vit breuriez vras ar Fe, distro ar bec'herien,  
Hag evit lakât ar peuc'h 'tre ar boblo kristen.

Goul 'refomp e vo torret al liammo devuz  
A chaden ebarz an tan an ineo klemmuz,  
Ni bedo c'hoaz 'vit an dud zo en pal ar maro,  
'Vit ma c'hefomp holl d'an Nenv da veuli hon Otro.

PERSON TREDREZ.